



Broj/Broj: 01/6-50-3-6-6/12

Sarajevo/Capajevu, 15. 3. 2012.

VIJEĆE MINISTARA BiH

PARLAMENT FEDERACIJE BiH

VLADA FEDERACIJE BiH

NARODNA SKUPŠTINA REPUBLIKE SRPSKE

VLADA REPUBLIKE SRPSKE

SKUPŠTINA BRČKO DISTRINKTA BiH

VLADA BRČKO DISTRINKTA BiH

Poštovani,

Komisija za ostvarivanje ravnopravnosti spolova Predstavničkog doma Parlamentarne skupštine BiH je na 6. sjednici, održanoj 15. marta 2012., utvrdila je i dostavlja vam na razmatranje

P R E P O R U K U

za poboljšanje položaja lica koja se nalaze na porodiljskom odsustvu

I. Komisija za ostvarivanje ravnopravnosti spolova Predstavničkog doma Parlamentarne skupštine BiH razmotrila je stanje u Bosni i Hercegovini u pogledu ostvarivanja prava porodilja na porodiljske naknade.

Na osnovu provedene rasprave Komisija je zaključila da je nivo ostvarivanja prava na naknadu za vrijeme porodiljskog odsustva u Bosni i Hercegovini potpuno različit, tako da se ne može govoriti o jednakom položaju žena u BiH.

Naknada za vrijeme trajanja porodiljskog odsustva je pravo utvrđeno međunarodnim dokumentima koji su pravnoobavezujući za Bosnu i Hercegovinu. Mnogi od tih dokumenata su sastavni dio Ustava Bosne i Hercegovine i ustava entiteta, te se direktno primjenjuju u Bosni i Hercegovini.

U članu 11. stav 1. tačka e. **Konvencije o uklanjanju svih oblika diskriminacije žena** garantira se pravo žena na socijalnu zaštitu, posebno u slučaju penzionisanja, nezaposlenosti, bolesti, invalidnosti, starosti i drugih nesposobnosti za rad, kao i pravo na plaćeno odsustvo. U tački f. istog člana predviđa se pravo na zdravstveno osiguranje i sigurnost u radnim uslovima, uključujući i zaštitu bioloških i reproduktivnih funkcija žena.

Međunarodnim paktom o ekonomskim, kulturnim i socijalnim pravima obavezuju se države potpisnice da osiguraju svima na svojoj teritoriji uživanje prava na socijalnu zaštitu i socijalno osiguranje. S ciljem ispunjenja ovih prava iz Pakta, od države se traži uspostavljanje sistema medicinske i socijalne zaštite te osiguranja porodiljske naknade.

Evropskom socijalnom poveljom obavezuju se države potpisnice, između ostalog, da osiguraju pravo na socijalnu sigurnost, iz kojeg proizlazi pravo na naknadu za porodiljsko odsustvo ili materinstvo.

Svim tim dokumentima, kao i Zakonom o ravnopravnosti spolova u Bosni i Hercegovini, zahtijeva se osiguranje navedenih prava bez diskriminacije.

II. Analizirajući uticaj postojećeg rješenja kojim je uređeno pitanje prava na naknadu za vrijeme trajanja porodiljskog odsustva, može se zaključiti da nivo ostvarivanja ovog prava zavisi od mjesta prebivališta lica, odnosno od mjesta uplate doprinosa za lice koje koristi porodiljsko odsustvo. Usljed administrativne podjele nadležnosti u skladu sa Ustavom BiH i ustavima entiteta u Bosni i Hercegovini, u ovom trenutku postoji 12 različitih modela za osiguranje ovog prava. Stoga je isplata naknada za lica koja koriste porodiljsko odsustvo veoma neujednačena, a u nekim se dijelovima države (kantonima) to pravo ne osigurava. Pravo na naknadu za vrijeme trajanja porodiljskog odsustva zasnovano na mjestu prebivališta zaposlenog/e je, nakon stupanja na snagu Zakona o plaćama i naknadama u institucijama BiH, dovelo do značajnih razlika za lica zaposlena u institucijama BiH.

Ovaj predmet razmatrao je Ustavni sud BiH i donio odluku kojom se zaključuje da je član 35. Zakona o plaćama i naknadama u institucijama u BiH diskriminatoran i suprotan članu II/4. Ustava BiH. Uz to je Ustavni sud BiH još jednom potvrdio da se „porodiljsko odsustvo naročito odnosi na prava žena da ne budu diskriminirane i da uživaju primjerene uslove rada“. Nakon ove odluke Vijeće ministara BiH uredilo je ovo pitanje svojom Odlukom o načinu i postupku ostvarivanja prava na naknadu za porodiljsko odsustvo u institucijama BiH.

U skladu s pravnim propisima u Republici Srpskoj, majka i otac djeteta mogu se sporazumjeti o tome da porodiljsko odsustvo, nakon isteka 60 dana od dana rođenja djeteta, umjesto majke može koristiti i otac. Pravo na korištenje porodiljskog odsustva i naknade za vrijeme njegovog trajanja za zaposlene u institucijama BiH i na području Federacije BiH pripada majci, dok otac to pravo može koristiti samo u izuzetnim slučajevima.

Iz navedenog se može zaključiti da Bosna i Hercegovina nije ispunila svoje obaveze u vezi sa osiguranjem prava na naknadu za vrijeme trajanja porodiljskog odsustva za sve svoje građane i građanke bez diskriminacije.

III. Uzimajući u obzir podjelu nadležnosti u oblasti socijalne zaštite u skladu sa Ustavom BiH, ustavima entiteta i kantona, te Brčko Distrikta BiH, Komisija za ostvarivanje ravnopravnosti spolova Predstavničkog doma Parlamentarne skupštine BiH

P R E P O R U Č U J E

Vijeću ministara BiH, vladama entiteta, kantona i Brčko Distrikta BiH, kao i skupštinama entiteta, kantona i Brčko Distrikta BiH da, u skladu sa svojim ovlaštenjima, reguliraju prava lica koja se nalaze na porodiljskom odsustvu tako da se osigura adekvatna zaštita materinstva i otkloni postojeća diskriminacija na cijeloj teritoriji Bosne i Hercegovine, te da učine napore na dalnjem unapređenju i standardizaciji ovih prava s ciljem ispunjavanja obaveza koje je Bosna i Hercegovina preuzeila prema međunarodnim konvencijama.

PREDSJEDAVAJUĆI KOMISIJE

Niko Lozančić